

TUSI TAIALA

MO LE PULEA MA LE VA'AIA LELEI O I'A MA FIGOTA

O LE AFIOAGA O

FAGALII

Novema 23, 1998

SAUNIA:

Pule mamalu a Alii ma Faipule ma tagatanuu o le Afioga o Fagalii faatasi ai ma le Iagolagosua a le Ofisa o Faigafaiva o le Matagaluega o Faatoaga ma Faigafaiva.

Tapenaina : Tafatofa Ferron Kolose Fruean

FAASOLOGA

1. Upu Tomua	3
2. Autu	5
3. Tulafono i Aso ua mavae : Faigafaiva-le-talafegai	5
4. Tapenaga o Ienei Tusi Taiala	5
Feiloaiga muamua	5
Feiloaiga ma vaega taitasi (Group meetings)	5
Komiti faufautua	5
5. Tulafono ma Faasalaga	5
5.1 Faasaina fanaia,ava-niu-kini ma vailaau oona	6
5.2 Faasalalauina tulafono a le afioaga	7
5.3 Faasaina upega ma tili mata ninii	7
5.4 Faasaina le lafoina o lapisi i le sami	7
5.5 Aoina le alamea	8
5.6 Faasaina tuiga, faamoa, ma saeuga	8
5.7 Ia faasaoina ma faateleina le amu	8
5.8 Faasa le lauina o le oneone	9
5.9 Faasaina fagotaga ma isi afioaga	9
5.10 Faasaoina to gatogo	10
5.11 Ogasami Faasaoina	10
5.12 Iloiloina o le gataifale mo le faafaatoagaina o figota	10
5.13 Unaia faigafaiva i tuaau ma aoaoga mo faigafaiva	11
6. Talosaga	12
7. Faamatalaga e uiga i le afioaga	12
8. Komiti o le Faasao	13
9. Toe iloiloina o Ienei Tusi Taiala	14

1. UPU TOMUA

O le faaititia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le afaifaiva
- le faaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaititia ai i'a ma figota. O le faaititia o nei tamaoiga o le sami e faaititia ai foi porotini maua (protein) mo le taumafa tatau (taumafa paleni) mo tagatanuu o Samoa. O se atugaluga tele lea i le Malo o Samoa na faapea ai ona faatino nisi o fuafuaga faataatitia e pei ona faailoaina atu i lalo.

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalosia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaitaimi. O se tasi o mafuaaga ona o le toaititi ma le toagaogao o le afaigaluega. Ae o seisi mafuaaga ua talitonu le taofi na faigata ona ausia ai lea tulaga ona e lei iai se polokalame i lea vaitaimi e pei o le Polokalame o le Faasao o le Gataifale mo Nuu ma Afioga. O lenei polokalame e pei ona faatinoina nei, ua fesoasoani tele i le faa-malamalamaina mo le silisfia e le mamalu o le atunuu o ia tulaga.

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O lenei tulafono na pasiaina ma le faamoemoe e tuu avanoa ma fesoasoani i le faasaina o i'a ma figota ua tauau ona mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoiga o le gataifale. O loo faapipiina atu i le pito i tua o le Tusi Taiala se Pepa o Faamatalaga (6) mo faamatalaga faaopopo o lenei tulafono.

O **Tulafono Laiti** a nuu ma afioga ua amanaia e le Faamasinoga. O se tasi lea o auala ua tuu sao ai e le Malo le malosi i nuu ma afioga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioga o Fagalii Vaimauga i Sasae. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaaia lelei o le gataifale i tulaga o ona tamaoiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioga taitasi.

Polokalame o le Faasaina o le Gataifale i Nuu ma Afioga

O le Polokalame o le Faasao na amataina e le Malo e tauala mai lea i le auunaga a le Ofisa o Faigafaiva i le tausaga e 1995. I le amataga mai la o lenei polokalame sa faapea ona lagolago malosi ai le Malo o Ausetalia e auala ma i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. Peitai na e lei faamuta ai i lea tausaga ona sa tauaveina loa e le Malo o Samoa le faatupeina o lenei polokalame taua. I le taimi nei, ua oo atu le afoaiga i le 85 nuu ma afioga ua faatinoina ai lenei polokalame. Peitai, mai i le 85 lea, e na o le 52 nuu ma afioga o loo tulai malosi ma faatauina pea lenei polokalame. O le talitonuga ma le faamoemoe atu o le tele o nei afioga o le silasila lea i le lumanai manuia mo tagata lautele o le afioga aemaise ai o tupulaga lalovaoa.

O le polokalame o le Faasao e galulue soosoo-tauau iai le ofisa ma le afioga i nisi o fuafuaga faataatitia aua se lumanai manuia aemaise o le toe faa-tamaoigaina o le gataifale. I le amataina o lenei polokalame e faatinoina ai ni faatalalanoaga ma vaega eseese o le nuu e pei o le vasega o matai, tina ma taulelea. O nei fefaasooaiga e faailoa mai ai faafitauli o loo faafeagai ma le gataifale o le afioga. E talanoaina foi aafiaga ma mafuaaga o nei faafitauli ma soalaupule ai ni fofo. Ma sa faapea loa ona soalaupule ai e Alii ma Faipule, tagatanuu o le afioga ma le ofisa nisi o fuafuaga faataatitia e foia ai nei faafitauli. O se faataitaiga o se fuafuaga faataatia a le afioga i lenei polokalame o le faia lea o se ogasami faasao e faasa ona solia, kolosiina pe fagotaina foi.

O nisi o fuafuaga faataatitia e tele ona faaogaina e afioga mo le pulea ma le vaaia lelei o tamaoiga (i'a ma figota) o le gataifale e aofia ai le faasaina o;

- vaiilau oona
- fanaia
- ava-niu-kini
- tuiga, faamoa, seuga
- i'a ma figota laiti
- upega ma tili mataninii
- lama moli-uila i po

O nisi o fuafuaga o Tusi Taiala i le tele o afioga mo le pulea tatau ma le vaaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- lafoai o lapisi i le gataifale (matafaga)

O lenei polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupuia o le tamaoiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afioaga i lenei polokalame.

O nisi nei o vaega matagofie i le Afioga o Fagalii, Vaimauga i Sasae



E.F.K.S.



FULL GOSPEL



2. AUTU

O le autu lenei sa faatalalanoaina i le faatalalanoaga ma vaega taitasi (matai, tina, taulelea) o le afioaga.

1. Ina ia puipui le siosiomaga o le gataifale

2. Toe faatupulaia le tamaoiga o le gataifale mo tupulaga o le lumanai

3. TULAFONO I ASO UA MAVAE : FAIGAFAIVA-LE-TALAFEAGAI

O le faasaina o faigafaiva-le-talafeagai e pei o fanaia, ava-niu-kini ma vailaau oona o loo faamamaluina ma amanaiaina i le afioaga o Fagalii. Ae peitai e iai lava nisi i totonu ma fafo atu o le afioaga e leo usitaia ma faamamaluina lenei tulafono taua tele.

O se mafuaaga taua tele e talitonu le pule ma le faamalumaluga o le afioaga ua aliae mai ai lea tulaga ona o le lava o le silafia ma le le-alofa i ia uso-faifaiva o loo faatinoina lea tulaga. E leo toe po se lilo i le afioaga i le ogaoga tele o aafiaga o nei auala faa-faigafaiva i le tamaoiga aemaise o le siosiomaga o le gataifale. Ae peitai o loo faatinoina lava e isi lea tulaga e aunoa ma se manatunatu ifo i aafiaga nei o loo tulai mai i a latou gaiiiga.

4. TAPENAGA

O lenei tapenaga sa saunia lava e tagata o le afioaga o Fagalii faatasi ai ma ni fautuaga ma le lagolagosua a le ofisa o faigafaiva.

Feiloaiga Muamua

O le feiloaiga muamua sa faafesootaia e Apulu Sefo Fonoti ia Iuni 8, 1998. O Setema 4, sa tauaofia ai le uluai fonu o sui o le Ofisa ma le Afioaga mo le faamalamalamaina ma le taliaina o lenei polokalame.

Feiloaiga ma Vaega (Group Meetings)

O vaega sa vaevaeina i ai e ofia ai Matai, Tina ma Taulelea. Sa feiloai nei vaega e tolu ma sui o le ofisa ma faatalalanoaina ai faafitauli o le gataifale o loo aliae i le afioaga ato ai ma ni fofu talafeagai e faaono foia ai nei faafitauli.

Komiti Faufautua

O le komiti faufautua na filifilia mai i vaega taitasi (matai, tina, taulelea), latou te molia finagalo faaalua o vaega taitasi i le fonu a matai. O lenei Komiti latou te tuu faatasia faamaumauga ma faamatalaga mai i vaega taitasi ma tapenaina ai se ata faataitai o le Tusi Taiala. O lenei Tusi Taiala o loo aafia ai lagona o tagata o le afioaga i le puleaina o faigafaiva ma le siosiomaga o le gataifale.

5. TULAFONO MA FAASALAGA

O tulafono ma faasalaga o ni fuatuaga faataatitia ua faamoemoe e faaono foia ai faafitauli ua faaalua ma faailoa mai e vaega eseese o le afioaga. E lua (2) ituaiga o fuafuaga, ma o le fuafuaga ua aupito sili ona taua o fuafuaga faataatitia e faatinoina e le afioaga.

O nisi fuafuaga faataatitia e faatinoina lea e le ofisa o faigafaiva. O nei fuafuaga e aofia ai le tuuina atu o fuatuaga ma fesoasoani nisi auala e pei o mafutaga-faaleaoaoga ma le tufatufaina o pepa o faamatalaga i mataupu e fesootai i le gataifale. O galuega uma lava e faatinoina e le ofisa o faigafaiva e ao ona faamaonia e le faatonu lagolago (Assitant Cheif Executive Officer) a le matagaluega o faatoaga ma faigafaiva.

I taimi o faatalalanoaga i vaega taitasi, e tele ni mafuaaga sa faailoa mai ae auga lava i le faafitauli ogaoga o le faaititia lea o i'a ma figota i le aloalo ma aau o le afioaga.

O mafuaaga ma o latou aafiaga i le siosiomaga o le gataifale sa faapea ona iloiloaina ma sailia. O tali o faafitauli ma fofu poo auala e foia ai na iloiloaina foi i faatalalanoaga. E le gata i lea sa faailoa mai ai foi ma vaega latou te faatinoina nei galuega.

Ae lei faamatalatala auiliiliina fuafuaga faataatitia a le afioaga na faapea ona autasi iai, e ao pea ona toe faamanino tulafono a le malo o loo lagolagoina lenei faamoemoe.

Tulafono Autu Tau Faigafaiva (1988) : O le tulafono a le Malo o Samoa e ;

- (1) Faasaina o Faigafaiva-le-Talafeagai,
- (2) Faamalosia ai le Laiseneina o Vaa-Fagota.

Tulafono Faatonutonu Mo Le Laiti Faatapulaaina mo I'a ma Figota (1995) : O le tulafono lea e faatapulaaina ai le laiti o i'a ma figota, ma le fuaina o mata-upega.

Tulafono Laiti : O tulafono a le nuu ma afioaga ua amanaiaina e le Faamasinoga.

O le vaega i lalo o le a auiliiliina atu ai atoatoa fuafuaga faataatitia sa aoina mai i vaega taitasi ma tuufaatasia e le komiti faufautua ma le lagologosua a le ofisa o faigafaiva.

TULAFONO MA FAASALAGA

5.1 FAASAINA FANAIA, AVA-NIU-KINI, VAILAAU OONA

O nisi o auala tau faigafaiva ua mautinoa lona tulaga ogaoga i le faatamaiaina o le alititai (amu) ma le tele o meaola o le gataifale. O se faataitaiiga o nei faigafaiva-le-talafeagai o fanaia, ava-niu-kini ma vailaa u oona (chlorox ta-lavalava). Ua le gata i le faaleagaina ai o se vaega tele o le alititai ae ua faapea foi ona faaumiumi se taimi e faapea ona toe faatupuina le tele o meaola ua aafia ma mamate ai. O le alititai o nofoaga ia o meaola laiti o le sami. Afai e mamate amu, ua sosolo ai loa le limulimu ma faapea ona le toe nofoia e meaola laiti o le sami. O lona uiga o le a leai foi ni i'a ma figota lapopoa o le a feoi ai i lea vaega o le gataifale.

Fuafuaga faataatitia a le afioaga

Talu ai ona o le tulaga pagatia ua iai le gataifale, o lea ua a'e ai se finagalo autasi i le komiti ina ia toe faamalosia tulafono a le afioaga sa faia i aso ua mavae, e faasaina ai faigafaiva-le-talafeagai e pei ona taua i luga.

O le puipuiga ma le faamamaluina o lenei tulafono o le a i lalo o le faamalumaluga a Alii ma Faipule faatasi ai ma le lagologosua a tagata o le nuu. O faasalaga uma foi ua taua, ua faamautuina lava e le komiti ma lo latou manatu ina ia mafai ona utagia e le afioaga.

E fautuaina ai pea le faamalosia ma le faalauiloaina o lenei fuafuaga faatitia poo se tulafono i le mamalu o tagatanuu o le afioaga faapea ma nuu tuaoi.

TULAFONO

Ua matua faasaina faigafaiva-le-talafeagai e pei o fanaia, ava-niu-kini, vailaa u oona, faamo'a, tuiga ma seuga ona toe faatinoina i gataifale o Fagalii.

FAASALAGA

Mo tagata o le afioaga e solia lenei tulafono, o le a faasalaina i le \$400.00 poo le 5 pusaapa.

O soo se tasi (mai isi afioaga) e solia lenei tulafono o le a molia loa i lalo o le Tulafono Autu Tau Faigafaiva (1988) poo le Tulafono Laiti a le afioaga.

5.2 FAASALALAUINA TULAFONO A LE AFIOAGA

O faasalalauina i leitiio, televise ma nusipepa o nisi ia o auala talafeagai lelei e faalauteleina ai tulafono a le afioaga. O le a silafia ai e le mamalu o le atunuu, malamalama ma manino lelei i le faatauina ma le puipua o le siosiomaga o Fagalii. O le Komiti o le Faasao o le a latou faamaopopoina ma tapenaina faasalalauina o tulafono.

Autu o le Faasalalauga: "Puipuiga o le Gataifale o Leusoalii"

5.3 IA FAASAINA UPEGA MA TILI MATANINII

O le faaogaina o upega ma tili mataninii ua maitauina le tele o i'a laiti ua faatamaia ai. Ua i ai le talitonuga o le a oo atu i se tulaga faaletonu i'a maua, pe a faaauaiina pea le faaogaina o nei ituaiga o faigafaiva. O le a oo ina faaitiitia i'a e mafai ona oo atu lo latou lapopoa e maua ai le avanoa e fanafanau ma tautuufua ai.

FUAFUAGA FAATAATITIA A LE AFIOAGA

Ua faailoa mai e le Komiti o le faaogaina o upega ma tili mataninii, o se tasi lea o mafuaaga ua faaitiitia ai i'a maua i le gataifale. Ua faapea foi ona faaalua mai e le Komiti lo latou matua lagolagoina o le Tulafono Faatonutonu o le Laiti Faatapulaaaina o I'a ma Figota ua iai nei mo le faatapulaaaina o mataupega ma tili mataninii.

Ua fautuaina e le Pule Mamalu a Alii ma Faipule atoa ai ma le Komiti le mamalu o le afioaga ina ia lagolagoina le tulafono o upega ma tili mataninii ua pasia e le Malo.

TULAFONO

Ua matua faasaina lava mataupega e i lalo ifo o le 2" (inisi) mo upega tatao ma tili ia le silia ma le 1.2" (inisi) lona mataupega ona toe faaogaina i ni fagotaga i le aloalo o Fagalii.

FAASALAGA

Mo tagata o le afioaga e solia lenei tulafono, o le a faasalaina i le 5 pusa apa poo le \$400. O lenei foi faasalaga o le a fuafuaina lava foi e tusa ma le solitulafono e Alii ma Faipule.

O tagata mai isi afioaga o le a molia sao i le Tulafono Autu Tau Faigafaiva (1988) ma le Tulafono Faatonutonu (1995) poo le Tulafono Laiti.

5.4 FAASAINA LE LAFOINA O LAPISI I LE SAMI

O le lafoai o otaota poo lapisi i le sami, ua avea ma mafuaaga o le faateleina ai o namu, ma manunua ai nisi o le aufaifaiva i atigiapa, atigifagu, ma uamea. Ua faapena ona avea ma punaaga o faamai ma tulai mai foi o se nofoaga le talafeagai mo le ola lelei o ia ma figota i le gataifale.

I lalo o le faamalumaluga a Alii ma Faipule, e fautuaina ai e le komiti o le faasao aiga taitasi o le afioaga, ina ia eliina ni lua i tuamaota ma tualaoa e lafoai i ai otaota ma lapisi . Ua talitonu le komiti o se auala pito sili lea ona saogalemu ma lelei mo le foiaina o lenei faafitauli tau i le lafoaiina o otaota ma lapisi i le gataifale o le afioaga. O lenei fuafuaga e faatinoina e le nuu atoa.

TULAFONO

Ua matua faasaina le toe lafoia o ni otaota ma lapisi i le gataifale o Fagalii.

FAASALAGA

O se tagata o le afioaga e solia lenei tulafono o le a faasalaina i le \$150.00 poo le 2 pusaapa.

O tagata mai isi afioaga e solia lenei tulafono o le a molia sao i Tulafono Laiti a le afioaga

5.5 AOINA LE ALAMEA

O le alamea o se meaola o le ituaiga o le aveau ma e nofo i luga o le aau. O lenei meaola e na te aiina meaola ninii ua taua o polipe o loo tutupu mai ai amu. A oo ina faateleina lenei meaola o le a faapena ona latou faatamaiaina se vaega tele o le aau ma pagatia ai le tele o meaola o loo faalagolago i le aau mo nofoaga ma meaai.

E LE MAFAI ona faaumatia pe tapeina le alamea i le vaevaeina o lona tino i le sami, aua e mafai e nei itu tino ona

faatupuina mai ai nisi alamea fou. E pau lava le auala e faaumatia ai lea meaola faalafua o le aumaia i uta i le paumatu e faamagoina ai pe tanuina ma avea ai ma faalelei-palapala.

Ua faailoa mai e le Afio'aga o le alamea o se tasi lea o mafuaaga o le pe o amu o le gataifale. E le gata i le faatamaiaina ai o amu ae afafia ai foi le soifua o tagata faifaiva, ma ua tuuina mai ai e le komiti se manatu ina ia fatamaia le alamea e ala lea i le aoina mai i uta i le paumatu ma faamagoina ai pe fai ai foi se isi o gaioga e tapeina ai.

E talanoaina e le komiti o le faasao i ana fonotaga aso faapitoa ua tasi iai e faatino ai le aoina mai i uta o alamea. E leai se polokalame a le Malo ua fuafuaina e totogi ai le faatamaiaina o le alamea ae peitai e pei ona autasi iai le afioaga i faatalatalanoaga o se tasi nei o faafitauli ogaoga. E mau foi le taofi a le afioaga le lumanai manuia mo le faasao ma le gataifale o le afioaga pe a faatinoina lenei galuega taua.

5.6 FAASAINA TUIGA, FAAMOA MA SAEUGA

O amu ua maitauina lona taua i le siosiomaga i le gataifale ona ua mautinoa ua avea lea ma nofoaga mo le anoano o meaola o le sami. Afai o le a faatamaiaina amu o lona uiga ua afaina foi le tele o meaola o loo nonofo ai. Tuiga, faamoa ma seuga o nisi nei o ituaiga fagotaga e le talafeagai ua matua faaleagaina ai amu aemaise ai figota laiti. Afai ae faauuina pea lenei ituaiga faigafaiva o lona uiga o le a sili atu ona tele se afaina o amu o loo fai ma nofoaga (alofaga) o i'a ma figota.

Fuafuaga faataatitia a le afioaga

Na faalia e vaega taitasi le tatau ona faia o se tulafono e faasaina ai tuiga, faamoa ma seuga i le gataifale o Fagalii aua ua mautinoa le faaleagaina ai uma ma meaola ninii o le gataifale. Ua matua lagolagoina e le komiti lenei tulafono

Tulafono

Ua matua faasaina ona toe faatinoina tuiga, faamoa ma seuga i gataifale o Fagalii

Faasalaga

O se tagata o le afioaga o le a solia lenei tulafono o le a faasalaina i le 2 pusaapa, a le usitaia o le a faasalaina loa i le \$150.00

O tagata mai isi afioaga o le a molia i le Tulafono Autu Tau Faigafaiva (1988) poo le Tulafono Laiti a le afioaga.

Fuafuaga faataatitia a le ofisa

O le a fesoasoani le ofisa i le faia o lipoti tususua e tuuina i le Faamasinoga mo le moliaina o i latou e solia lenei tulafono. O le a fesoasoani foi le ofisa e faamalamala atili le faatinoina o ia vaega i le afioaga.

5.7 IA FAASAOINA MA FAATELEINA LE AMU

O le puipua ma le faasaoina o amu o se tasi lea o auala ua mafai ona toe tutupu ma ola ai amu. O le faateleina o amu, o se itu lelei lea mo i'a ma figota aemaise meaola ninii o le gataifale o loo faalagolago mo meaai ma o latou nofoaga. O le faia o se ogasami faasaoina ma le taofia o faigafaiva-le-talafeagai, o nisi ia o fuafuaga tatau ma talafeagai mo le faateleina o amu.

Fuafuaga faataatitia a le afioaga

Ua faalia e le komiti o le a faia se ogasami faasaoina o se auala lea ua mautinoa e mafai ona faasao ma faateleina ai amu. O lenei faasao o le a faatinoina e le komiti faapea Alii ma Faipule. O le vaaia lelei ma le mataituina o lenei faasao o le a feagai lea ma tagatanuu o le afioaga.

Fuafuaga faataatitia a le ofisa

O le a fesoasoani le ofisa i le faamalamalamaina o itu lelei o le faasaoina o amu ma tufaina atu foi ni pepa o faamatalaga e faalauiloa atili ai lenei mataupu.

5.8 FAASA LE LAUINA O LE ONEONE

O le lauina ese o le oneone mai le matafaga o se gaoiga ogaoga lenei mo le siosiomaga lautele o le gataifale. O nisi o aafiaga e tulai mai o le faateleina le o le elele tafia (palapala soloia) i le gataifale ma faapea ona nefu le siosiomaga o le gataifale. O vaega nefu pe palapala foi o le gataifale o le a alofia e meaola o le sami ona e faigata tele ona feola ai.

O oneone o le matafaga, o apitagalu faa-le-natura ia e tetee atu i le malolosi mai o au ma galu o le sami. Afai ae aveeseina, o lona uiga o le a tele se aafia o afioaga tu-mataga mai galu aemaise o faalavelave faa-le-natura e pei o afa ma matagi malolosi.

Fuafuaga faataatitia a le afioaga

Na faaalua e le komiti, o le lauina o le oneone mai le matafaga o se tasi lea o mafuaaga o le faaititia o i'a ma figota. O lea ua fausia ai se manatu ina ia taofia le faia o lea tulaga aua o lona uiga o le a mafai ona faaleagaina ai le siosiomaga o le gataifale ma ona tamaoiga.

TULAFONO

Ua matua faasaina se tagata ese ona laueseina oneone mai gatafale o Fagalii

FAASALAGA

O tagata uma o le afioaga o le a solia lenei tulafono e ala i le faaulufaleina mai o ni tagata ese o le a faasalaina i le 2 pusaapa poo le \$150.00

O tagata o isi afioaga o le a solia lenei tulafono o le a molia sao i Tulafono Laiti a le afioaga.

FUAFUAGA FAATAATITIA A LE OFISA O FAIGAFIIVA

O le a fesoasoani atu le ofisa i le tuuina atu o ni fautuaga ma ni faamatalaga e uiga i lenei mataupu e ala atu i pepa o faamatalaga.

5.9 FAASAINA FAGOTAGA MA ISI AFIOAGA

O fagotaga mai isi afioaga e faaaogaina ai faigafaiiva e le talafeagai e iai ava niukini, fanaia ma vailaau oona ua mautinoa le matua faaleagaina ai o le siosiomaga o le gataifale. Ua le gata i lea, a ua faaititia ai i'a ma figota o loo manaomia e tagata o le afioaga mo taumafa.

Fuafuaga faataatitia a le Afioaga.

Ua faaalua mai e le komiti le tataua ona faia o se tulafono e faasaina ai nei faigafaiiva-le-talafeagai. O le autu moni o lenei tulafono ona o nei faigafaiiva mai isi afioaga o loo aumaia faigafaiiva-le-talafeagai ma faatinoina i lo tatou gataifale ma faaleagaina ai.

Tulafono

Ua matua faasaina lava tagata fagotaga mai isi afioaga ona faatinoina faigafaiiva le talafeagai e pei o fanaia, ava-niukini, vailaau oona, tuiga, faamo'a poo nisi lava faiva le talafeagai i le gataifale o lenei nuu

Faasalaga

O i latou uma e solia lenei tulafono o le a molia i le Tulafono Autu Tau Faigafaiiva (1988) ma Tulafono Laiti a le afioaga

5.10 FAASAOINA TOGATOGO

O togatogo o se tasi lenei o vaega ua tele sona sao i le gataifale mo le toe faatupuina o nisi o i'a ma figota. O le taua o le fasaoina o togatogo ona o nisi meaola ninii o le gataifale ua avea lea nofoaga ma vaega e sulufai i ai mai o latou fili, a o nisi iua avea togatogo ma nofoaga e fanafanau ma tautuufua ai. A tanumia pe taina i lalo ma faaleagaina togatogo o lona uiga o le a faaititia i'a ma figota mo tupulaga o le lumanai.

FUAFUAGA FAATAATITIA A LE AFIOAGA

Ua ioeina e le komiti le tatau ona faamalosia o le faasaoina o togatogo ona le fia faasaoina pea o i'a ma figota ma isi meaola o loo avea lea vaega ma nofoaga e fanafanau ai. O togatogo o nofoaga ia e lalafi ma mapu iai le tele o i'a laiti mai i o latou fili. O otaota foi ma i lau laau o togatogo o se tupuaga lea o minerale, ma isi anoano o meaai mo nei meaola laiti. O le faasaoina o lenei togatogo o loo faamamaluina e le pule mamalu a Alii ma Faipule.

TULAFONO

Ua matua faasaina lava ona toe taina i lalo pe faatamaia togatogo o loo ola i totonu o lenei afioaga

FAASALAGA

O soo se tagata o le afioagae solia lenei tulafono o le a faasalaina i le 2 pusaapa poo Ie \$150.00

O soo se tagata mai isi afioaga e solia lenei tulafono o le a molia i Tulafono Laiti a le afioaga.

FUAFUAGA FAATAATITIA A LE OFISA

O le a tuuina atu e le ofisa ni pepa o faamatalaga e faatatau i le taua ma Ie aoga Ie Togatogo e faamalamalama atili ai lenei mataupu.

5.11 O GASAMI FAASAOINA

O se vaega o le gataifale ua faasaoina e tatau ona le toe aafia i ni faigafaiva. O le avea se vaega o le gataifale ma vaega faasao, e ao ona aafia ai le malu puipuia o le siosiomaga ma ona tamaoaga i figota ma i'a.

O lenei vaega faasao le a faasaoina ai amu, aau faapea foi ma i'a ina ia mafai ona maua e nei meaola Ie avanoa e tautuufua ma fanafanau ai. O le autu taua lava, o le a avea lenei faasao ma punaaga o i'a ma figota e mafai ai toe faaleleia nisi vaega le gataifale ua afaina. O le a fanafanau ma tautuufua i'a ma figota o loo aumau i le vaega faasaoina ma tafea atu o latou fuafanau ma faatupuina ai nisi meaola fou i nofoaga ua le maua ai ni i'a ma figota. O le a le pine ona manuia ai i tatou ae faapea foi tupulaga o le lumanai.

FUAFUAGA FAATAATITIA A LE AFIOAGA

- Galulue faatasi ma le lagolagosua i le ofisa i le iloiloina o se vaega talafeagai o lona gataifale e avea ma vaega faasaoina.
- Talanoaina ma auiliilina le lipoti ma ia faia se faaiuga i le faavaeina o le ogasami faasaoina.
- Faatinoina le mataituina, tausiga ma le vaaia lelei o le ogasami faasao.

FUAFUAGA FAATAATITIA A LE OFISA

- Faatinoina le iloiloga o le tulaga o se vaega o le gataifale e avea ma vaega faasaoina.
- Saunia le lipoti mo le tuuina aloaia atu i le komiti o le Ofisa ma le Fono.

5.12 ILOILO LE GATAIFALE MO LE FAafaatoagaina O FIGOTA

O le tufaina atu ma le faafaatoagaina, ua faatatau lea i le auina mai o ni figota poo ni i'a mai isi atunuu ma tufaina atu e faaola i se ogasami ua talafeagai. O le faafaatoagaina ua faatatau lea i le faaolaina o figota i se nofoaga ua saunia. O nisi nei o atinae mo le faatupuina o figota aua le toe faaolaina i se ogasami ua talafeagai lelei.

Faamatalaga faapopo : Tufaina o Figota

O le tufaina o le aliao i le tele o atunuu o le Pasefika ua mautinoa ai le tele o ni faamanuiaga na mafai ona seleseleina e nei atunuu. I Fiti, na mafai ona toomaga i ai tagata i le aano o le aliao e avea ma mea taumafa. O lona atigi na mafai ona faatauina atu e gaosi ai faamau o ofu i fale gaosi mea. I le Atu Kuki e tusa ma le 280 aliao na tufaina atu i ai ma na mafai ona maua mai ai se aofaiga e tusa ma le 200 tone o atigi aliao i lea tausaga na faatauina i fale gaosi faamau. I le 1990 na tufaina atu ai i sami o le motu o Namua i Aleipata le 400 aliao, ma e le 0 mai iloa tonu le tulaga ua oo i ai nei aliao.

I le tele o vaega o le aloalo ma aau o Samoa o loo maua ai figota e pei o le pae, asi ma LIe tugane. O nei figota ua mautinoa lo latou faaitiitia talu ai o le soona fagotaina e tagata mo taumafa ae ua faapena foi ona faatamaiaina o latou nofoaga e afa malolosi. I le tele o nofoaga ua le toe maua ai nei figota, pau le faamoemoe o le aumaia lea o ni

figota mai nisi atunuu ma tufaina atu i ai aua le faaolaina i nei vaega o le gataifale.

Fuafuaga faataatitia a le ofisa

- Galulue ma le aufaigaluega a le ofisa i le faatinoga o le iloiloga pe talafeagai ma lelei le gataifale mo le faafaatoagaina ai o figota.
- Auiliiliina o le lipoti i suesuega o le talafegai o le gataifale, ma ia faia se faaiuga i le fatinoina o nei atinae i totonu o Fagalii.
- Galulue faatasi mo le puipui o nei atinae ma le vaaia o tagata o loo latou faatamaianama solia tulafono e faatau i nei atinae.

Fuafuaga faataatitia a le ofisa

O le a oo atu se alii ofisa mai le vaega suesue, ma suesueina le gataifale o le afioaga, ina ia faamaonia le talafeagai mo le faaolaina ai o ni figota. O le a mafai ona tuuina atu ni figota pe afai o le a faamaonia le talafeagai o nei nofoaga mo ia atinae.

- Fesoasoani mai le ofisa e ala lea i le vaaia ma le mataituina o le sologa lelei o le tuputupu ae o figota.
- Saunia ni aoaoga mo le faamalamalamaina o olaga faanatura o nei figota.

5.13 UNAIA FAIGAFAIVA I TUAU MA AOAOGA MO FAIGAFAIVA

E mafai ona faaleleia le tamaoaiga o i'a ma figota maua i aloalo, aau ma vaega o le gataifale ua faaleagaina, pe afai ae faaititia le fagotaina o nei vaega o le gataifale. O se tasi o auala e faaleleia ai le tamaoaiga o le gataifale, o le fagotaina lea o ogasami e lei fagotaina lava, aemaise o tuaau mamao.

Fuafuaga faataatitia a le ofisa

Ua iai le talitonuga i le komiti e ao ona unaia ma faamalosia faigafaiva i tuaau ma aau mamao ina ia tuumamaina ai le fagotaina o i'a ma figota o le aau ma le aloalo. Ua le gata foi ilea ae o le a mafai ai ona toe faatupulaia ma faaleleia ai le tamaoaiga o le tele o vaega o le gataifale, aemaise i le aloalo, ua faaleagaina. Ua talosagaina foi le ofisa ina ia faatinoina se aoaoga i auala tau faigafaiva e aoaoina ai le autautai o le nuu ma ia faatautaia e se alii ofisa o loo iai le tomai faapitua i mea tau faigafaiva.

Fuafuaga faataatitia a le Ofisa o Faigafaiva

Talu ai ona o le tele o nuu e leai ni vaa e talafeagai mo fagotaga i tuaau, o lea ua taumafai ai le ofisa e saili fesoasoani mo le faafaigofieina o le mauaina o ni vaa talafeagai mo lea faamoemoe. O le a iloiloaina foi e le oisa o manaoga i auala e aoaoina ai i mamalu o le autautai o le afioaga.

E aofia ai i nei aoaoga le teuina ma le vaaia lelei o i'a i luga o le vaa, saogalemu o le aufaifaiva i luga o le sami, tausiga o afi vaa, faasuina o i'a, ma isi lava mataupu taua.

6. TALOSAGA

O nei talosaga sa mafai ona tuuina mai e sui o le afioaga, sa auai i fonotaga ma le ofisa i taimi o faatalalanoaga i vaega e tolu. O talosaga uma foi la ua tuuina mai sa faamautuina e le komiti i le latou fonotaga ma le ofisa. Pe a talafeagai, o nei talosaga o le a mafai ona iloiloaina e le ofisa mo le faataunuuna. O talosaga uma sa tuuina mai o loo faailoa atu i lalo.

- Faisua
- Ogasami faasaoina.
- Vaa fagota
- Tilapia
- Aliao
- Gau
- Ula vai
- Pae
- Aoaoga i mea tau faigafaiva. (faataitaiga: aoaoga i Ie olaga faanatura o le faisua.)

7. FAAMATALAGA E UIGA I LE AFIOAGA

O nei faamaumauga e pei ona faamatalalaina atu i lalo na aoina mai i le tausaga e 1998 i le faatoa faatinoina o le polokalame i le afioaga o Fagalii, Vaimauga Sisifo.

O le faitau-aofai o le afioaga e mai le 1000 i le 1800 tagata. E tasi le aoga tulagalua o loo iai i totonu o afioaga. O ekalesia o loo faapea ona Osi Taulaga i totonu o le afioaga o le Ekalesia EFKS, Ekalesia Papatiso ma le Ekalesia Full Gospel.

Foliga faa-le-natura o le gataifale ma lona siosoimaga

O le umi o le aaui o le afioaga (mita)	100 – 150
O le mamao o le aaui mai le matafaga (mita)	150
O le loloto o se vaega aupito sili ona looto o le aloalo pe a pe le tai i le taimi nei. (futu)	3
O le loloto o vaega e aupito sili ona loloto o le aloalo pe a pe le tai i taimi ae lei afaina i afa. (futu)	3

Faamatalaga faa-faigafaiva

O le faitauaofai o tane faifaiva e fagogota i le sili atu ma le tasi le aso i le vaiaso	20-50
O le faitauaofai o tina faifaiva e fagogota i le sili atu ma le tasi le aso i le vaiaso	20
O le aofaiga o tagata e fagogota i tuaau mai le tasi le aso i le vaiaso	3 - 10
O le aofaiga o paopao e faaogaina mo faigafaiva i totonu o le afioaga nei	3
O le aofaiga o alia fagogota o loo faaogaina mo faigafaiva o le afioaga nei	■■■■
E faatagaina ni tagata fagogota mai nisi alalafaga e fagogota i lo outou gataifale?	Ioe

Ituaiga ia/figota	Ituaiga Faigafaiva	Taimi faaalu mo le tasi le tauia/10 ia fou(hrs)	
		Taimi nei	10 tausaga ua tea
I'a maua soo (se 5)			
1. Aua	Tili	2 itula	20 minute
2. Pone	Mata/Fana	2 itula	1 itula
3. Alogo	Mata	2 itula	1itula
4. Mataeleele	Upega/Matau	5 itula	1-2 itula
5. Mumu	Lama/Upega	5 itula	1-2 itula
Figota maua soo(se 3)			
1. Tuitui	Ao/Fai tuitui	24 itula	1 itula
2. Fugafuga	Tofu	24 itula	1 itula
3. Sea	Tui Sea	½ itula	30 minute
Isi Faigafaiva		Taimi faaalu mo le /10 mea ua taua (hrs)	
1. Tuitui	tuitui (ato)	24 itula	
2. Lama Savali	faisua	seasea	
3. Tui Laau	ula	seasea	
4. Matau	paa (kuku)	seasea	
5. Eli pipi	sea	1 ma le afa aso	

VAEGA TAU A O LE SIOSIOMAGA MO FAIGAFAlVA		
Vaega	Vaega Taua (sikuea mita)	
	Taimi nei	Sefulu tausaga ua tea
Togotogo	50 m ²	100 m ²
Amu	20 m ²	150 m ²
Vaovao o le sami	100-150 m ²	leai

8. KOMITI O LE FAASAO

Pulenuu : Tuisuga Letaua Simi
Taitai Komiti : Pololua Loa (26683)
Sui Taitai Komiti : Fuamatu Neru
Failautusi : Sianini Saio

KOMITI MATAI

Matapula Pelenato
Pule Tuilaepa
Taloalii Faoato
Puna Alē
Tapunuu Osooso
Aimaleaga Tino
Tapunuu Ala

KOMITI TINA

Eti Fuamatu
Tafi Maneta
Lagi Salapo
Tuaoloa Malouafuli
Mautoatasi Saleupolu

KOMITI AUMAGA

Apelu Na'i
Tasi Collins
Reupena Puna Alē
Sianini Saio



Fuamatu Neru, Loa Pololua Sekala, Tuisugaletaua Simi



Aualuma a Tauiliili

9. TOE ILOILOINA O LENEI TUSI TAIALA

O lenei Tusi Taiala e taua lona toe iloiloina mai i lea taimi i lea taimi. O lenei galuega e mafai ai ona faatino pea ni fesuaiga e finagalo ai le komiti aemaise o Alii ma Faipule o le afoaga. E mautinoa lava o le a iai ni suiga mai i lea tausaga i lea tausaga.

O le mafuaga e taua ai le toe iloiloina o le Tusi Taiala ona o se avanoa lelei lea e toe talatalanoa ai le sui o le ofisa. O lenei avanoa e mafai ai ona faailoa mai nisi faafitauli ma tulaga eseese o loo feagai ma le komiti e uiga i le polokalame e mafai ona faasoa atu ai le ofisa i ni fautuaga ma nisi auala e fesoasoani ai.